

翹懃軒叢稿之一

舍姪仙錫悲悼其妹而殤  
敬求 諸公寵錫詩文

翹懃軒文集

# 翹勳軒文集續編

翹勳軒叢稿之一

開縣彭作楨撰

## 附 完縣新志序

吾國方志發源於晉宋有謂爲漢者究不如晉宋之確而盛行於今綜其時期可分爲三晉及劉宋純重地理趙宋以來兼及人物明及清初無一縣無志體裁皆仿一統志此爲一統志例推行時期清嘉慶章實齋惡其蕪雜毅然以修史之法用之於修縣志其文史通義外篇詳哉言之後有作者率奉爲圭臬雖閒有變通而大體弗易此爲史例推行時期今則入第三期矣中外交通不獨政治經濟法律及一切科學堪資採擷其哲學文學史學等亦足以補吾國之所短正史應否仿西例既待商榷方志之例如何迄今尙無定論以余思之約有三端一曰演進新史學注意於文化之遞嬗方志何能外斯例教育禮俗等項皆有其變遷之跡及其所以然舊志僅具崖略而於八景再三咏嘆未免輕其所重而重其

所輕今釐其弊則在編年與統計俾演進情形可按卷而得或謂吾國史籍正史編年紀事本末三種而已正史人各爲傳編年始於春秋而涑水通鑑繼之紀事本末與西史相類方志列傳似正史分門敘述略似紀事本末而實則近於文獻通考今忽責以編年毋乃迂而不切乎應之曰春秋功在萬世不惟譏世卿開戰國以後布衣卿相之局而已其編年爲後世所則倣足與國民以深切之歷史觀念印度於佛之出世竟有數說不能確指其年月他皆類此歷史觀念薄弱所以見滅於英人也方志雖不能學通鑑之編年而於所分各門務必大書時代以誌弗諼惜舊志茫昧每事多無年月可考今應變通辦法有年月者仍之無年月者姑付闕如惟新增則必詳載勿佚大事記年月尤關重要廿四史首列本紀爲編年體大事記之應編年亦卽此義民國以國民爲主體何嫌於因襲專制時代之本紀乎至統計內仿史記各表外仿泰西成規無俟贅言特近人所修新志僅知注重統計而不留意於編年爲一大缺陷此僕所

以執筆徬徨而不能已於言也余嘗讀汪容甫廣陵通典矣年月昭晰事實融貫質言之乃廣陵大事記耳縣志分門取於橫此典則不分門牟尼一串取諸暨若縣志各門類皆繫以年月記載家何難薈萃而作一縣通典哉二曰平凡正史所載皆勳業彪炳之人方志則旁及好施與等事此卽平凡之意古人視爲無聊近代反之尙當推廣凡有一行可取一長可稱者均載入惟節婦一項頗有謂應刪削者實有此人姑諱其名其言曰孔子作孝經而不言守節故孔氏三代出妻爲後世離婚之濫觴孫總理所言各德亦不及節字縣志何得再提倡守節余以爲吾國婦女受束縛爲不可掩之事實物極必返解放之說遂興如因此而遂刪削舊志節烈則大爲不可婦女值強暴寧死不辱此爲爭自由時無論古今地無論中外靡不重之至平時守節不願嫁固爲舊禮教所薰陶然各行其是鄉黨稱焉修志者對於舊志節烈認爲時代使然而於近日之不守節者亦不加以詆諆斯兩得之余著讀書識餘有名賢之母改嫁一段正所謂人

情所不能止者聖人弗禁也以外則細民實業農村情狀方言歌謠民間傳說舊志視爲平凡不載一語者今皆應觀縷敘述各縣新志多缺民間傳說一項蓋不知其重要劉序已詳言之矣三曰財政古今中外學說以解決生計爲第一大事而人民生計與國家財政地方財政均有息息相關之處正史而不注意於財政是謂無識縣志亦何獨不然陸隴其靈壽志吳肇甫深州風土記賈佩卿鹽山新志均知此意然吾猶嫌其缺而不備也做縣數年前四川開縣每歲納稅捐六百萬餘圓近亦在三百萬元以上田賦預徵至五十一年此同鄉來平所言余答以修縣志時須請秉筆諸公將每歲納稅捐之數列表詳載今接閱冀縣征糧征車征兵提款等表實獲我心蓋人民所納者與大局有密切之關係一爲詳載則展卷者可知某年大局如何不待煩言而已瞭然於胸中矣此縣志與國史相聯屬之處操觚者何容漠視以上三端爲修新志之重且大者細目無庸詳論今姑名此期爲新史學推行時期一曰民衆加入縣志時期未知世之君子

以爲何如民國十八年六月余署完縣適值 省府通令修志縣紳劉君琢之  
以舉人歷任安徽繁缺解組歸來深以縣志經雍正辛亥後卽未重修忽忽二  
百年矣文獻闕略甚爲惋惜余因敦請擔任此事磋商數次設置修志委員會  
派員採訪而余充總纂十九年九月卸篆臨行時劉紳以修志爲問余謂可以  
相助廿年冬劉紳致箋仍請余總纂余思清乾隆時段玉裁權篆富順謂既非  
實缺不過信宿逆旅耳將何以遣縣民故盡力於修志一事志甫成而段去任  
矣光緒時余澤春權篆貴州省古州編纂州志未幾去任旋以知府需次雲南  
仍攜志稿自隨旣成書寄其門人陸漸鴻屬陳於官而刊行焉兩公權篆未久  
尙如是其殷殷去任後且以修志爲事余署完一年三閱月爲時較永安可於  
修志而不一究心乎當卽應諾今年三月三日劉紳攜志稿來平余正染瘧紅  
熱延及全家兩姪皆殤悲悼無暨病榻中尙執此稿乘神志清爽時加以點竄  
七月舍弟云凡又病血痢延醫購藥需余料理以是對於縣志又未免延遲今

值酷暑揮汗拈毫更定門類整理文字按日程功始於陽歷八月底告竣年久事湮諸未賅備如求其詳應俟來哲

又序

代劉琢之作

完縣志年久未續余素有志纂述解組歸來 省府又令催各縣續修十八年夏彭前縣長澁任乃商定組織修志委員會派員採訪彭前縣長擔任總纂採訪未畢卽卸任廿年冬余與同志馬壽堂鄭玉符等分撰各門完竣並將全稿由余核閱一次嗣以方志乃千秋之業未可造次函詢彭○能有餘閒修改此志否旋得覆應允廿一年春余携全稿赴平面交彭○及家屬正染時疫臥榻之上不忘此書及八月下旬書始告成歷時三載稿件層疊而始有今日蓋著述若斯之難也全書綱領一疆域二行政三教育四文獻五食貨六風土七故實而以敘錄殿其末附圖一表三十四爲卷凡九

每卷較他書爲厚

另編完縣文徵一

書不雜廁新志中或謂歷覽方志不曰疆域卽曰地理從無有二名並列而強

爲區分者今奉 省府頒到徵集各縣志料門類首疆域次地理似可歸併爲

一應之曰余揣並列之意疆域就輪廓而言地理則就有條理而言區分亦未

嘗不可或又謂區域叙縣治及各機關之所在城廂概況全縣區數各區村鎮

名稱在從來志例則特立建置門

省府疆域門內有區域小目而無建置

應之曰王湘綺衡陽湘

潭兩志有建置而桂陽州志則併入他門本編改區域爲建置附疆域內惟疆

域之後不復更列地理取其便於省覽耳又 省府所頒氣候列爲專門本編

仿余澤春易順鼎古州廳志之例亦列疆域

新地理課本皆附氣候

合散爲整古人著述

之定例也疆域既定而政治興焉人口爲庶政所從出自成周以來名臣碩儒

詳哉言之泰西尤爲縝密而新舊各志多標名賦役失其義矣

王湘綺三志尤不免此

省府所頒人口列專門而無所附屬茲特列入行政門組織之後財政之前庶

幾條理井然教育本可隸行政

新舊各志多如是

惟此後救國大業專恃教育特立一

門以示尊崇且事務較繁亦非數紙所能昭宣古人著述以附庸而蔚成大國



者多矣事實使然何足深訝人物包括鄉賢名宦此吾國方志舊規章實齋已言其不當而尙嫌未盡官吏在吾縣如有善政無論其昔在本籍及歸田後行爲如何均應詳載其無善政也即使居鄉時文如班馬孝如曾閔亦祇由其本籍之縣載之而服官之縣可付闕如此不特服官之縣無從查其素行也即使能查矣而爲一縣之官吏所重在政不在素行載素行亦係附帶而最重處仍在政豈可與鄉紳相混哉故職官另列一目不入人物內其主旨並非尊職官而實用以限職官俾宰是縣者知在任無善政縣志僅列名於表內如點卯簿而已安得不自策勵乎去任之人現尙生存雖有善政暫不登載亦史例使然本編行政門職官載外籍之人文獻門人物載本縣之士卽是此意人物範圍較寬凡居鄉有德及服官外省有政聲者或一人而兼有上二端者均入之在完言完例應如此而或者譏爲蕪雜謬矣至長於藝術者亦人物之一附入此目不特立一門焉物產實業金融 省府分爲三門茲以食貨統之俾免零碎風土加民間傳說頗有疑其不經者不知吾

國上古及西周之故事半出國史半採自民間傳說如孟子所載伊尹割烹要湯等即  
以東周故事論一事也諸子均錄如伯牙鍾子期事雜見於荀子呂覽秦策史記等類詳略互異甚或抵  
觸其時代亦有參差此皆著者得於民間傳說使然漢興以來正史駢羅然每  
有正史未列流而爲小說者亦有採小說入正史者如晉書採世說搜神記等類其小說均  
由民間傳說而來始也採民間傳說入小說繼也民間讀小說更傳說於無窮  
亦有民間傳說始終未採入小說者亦有採入小說而其書不傳者太史公謂  
百家言黃帝文不雅馴百家言者言民間之所言也民間所言隨時代爲變遷  
使歷朝有人勒爲專書可以見其時人民之思想而不以事跡有無爲例專制  
時代崇拜皇帝清季民間多言明太祖微時驅遣鬼神等事當是明遺民造作  
以傳於今者安得不謂之有種族思想乎孟姜女王昭君梁山伯三人事跡其  
原籍及經過地之方志均載之近人曾詳考歷朝說部戲劇隨時多方緣飾俾  
三人迄今猶騰播於婦孺之口由此而知一國之政治法律禮教風俗均不外

此隨時緣飾之例矣。倘使各縣新志皆立民間傳說一目，再有人薈萃各縣志中民間傳說成一巨著，吾國普通人民之思想可於此而得其大凡。在上者因以獲施教之方針，社會學及文學家亦大感興趣，豈能以其傳說不盡真實而加之屏斥哉？故事門易名故實俾便收入金石，茲並增重要案件與前條適成爲反對一遁於虛一徵諸實而有用則一國史所載皆大事，方志亦搜羅縣政。今始探及平凡，然從無載民刑案件者，意以爲閭閻訴訟何足當大雅之一顧？不知國者民所積，無民斯無國民事，或雅或俗均不容漠視。況案件與政法有密切關係乎？本編錄特別各案足以爲鑑者而瑣碎訟事不與焉，以言實益約有三端：一案之破獲必有其因，後之臨民者可以參酌；二劇盜於全縣治安有關，錄其始末俾人民異日知所預防；三案件千態萬狀，每出人思想之外，擇要錄之足覘民俗。夫小說所載奇案，故爲詭譎，人每嗤之以鼻，若各縣能依據檔案編入縣志，豈不信而有徵乎？近各戲園每演玉堂春一劇，此事山西洪洞縣

署有明代卷宗可查民國年間失遺今遂不知其內容如何使早影印入縣志何至考戲劇本事者失此真實材料以上所述自知陋劣世不鮮魁儒碩士能賜教以資匡救乎則裨益志例良多矣

### 凡例

一門類 省府所頒修志門類不過略示準則並非強各縣葫蘆依樣也作楨今參以新意分別改隸並增入民間傳說重要案件兩項至關隘外僑等爲完縣所無故付闕如

二訂正 本編對於以訛傳訛之處特爲考訂例如孤山卽都山豆山白崖卽蒲陽下叔之叔卽蘇水之蘇夏屋卽賈復寡婦女神有廟因龕主姓名而訛太子稱菴並非丹朱王晉所泄以太子爲佛亦可備一說略舉數端其他可知矣至舊志名縣爲邑名知縣爲令名府爲郡名知府爲太守與當時制度相戾人物稱公而不稱名先生烈婦冠於傳首早爲通人所譏作楨今一一加以改正

三撰人 歷來方志均列總纂分纂等姓名於首而不分別爲某任某門至在任之人僅作一序並未筆削全稿甚有全未寓目者亦稱爲總纂殊非核實之道本編一一叙明某撰某門至覆核全稿加以點竄者則作楨也人物全是另立新目更張尤多

完縣新志目錄 七門共三十四表目錄內不具列

縣 圖面積具見於此

疆域第一沿革 方位 氣候 建置 山脉 河流 交通 名勝 古蹟

行政第二職官 (附六表 官績列傳) 人口 財政 治安 自治

教育第三

文獻第四人物 (附二表 名績列傳 篤行列傳 藝術列傳 列女) 著述

食貨第五物產 實業 金融

風土第六宗教 民生 禮俗 歌謠 方言 民間傳說

故實第七金石 大事記 重要案件 軼聞 附敘錄

附 徵集各縣志料門類 河北省府所頒錄此以與新志目錄比較可得其改隸之跡

## 疆域

(1) 沿革 由最遠可稽者起歷叙因革之迹每經改革係在某朝某帝及

其年代每次改易縣治在今某地爲文詳述無取列表

(2) 位置 詳叙四至及縣城與鄰縣縣城之距離

(3) 區域 縣治及各機關之所在城廂概況全縣共分幾區各區村鎮名

稱并須詳叙勿遺

(4) 面積 以前志書所載各縣面積沿襲訛誤多與實際不符此次務按

照實際記載

## 地理

(1) 山脈 按本省山脈或屬陰山或屬太行該縣之山屬於某脈必須述

明至境內山脈分支趨向形勢名稱均宜撮要述之

(2) 河流 歷叙發源(在本縣境者)入境經流匯合出境地點及今昔變遷之迹有何項利害水流緩急漲落情形均應詳述

(3) 交通 大道津渡汽車路鐵路電報電話等

(4) 關隘 名稱地點形勢史蹟均應詳述

(5) 名勝 如有古今人題詠佳作亦宜附抄

(6) 古蹟 凡書卷所載故老所傳大自高嶺長河細至疎林片石凡有稱道之價值均可叙列并須略述原委及現時情況不可但舉其

名

氣候 天時寒煥雨量多少等

人口 按照最近調查詳載戶數及男女人數

物產 列叙所有農礦山林水澤物產之名稱產量用途銷路如有特產更

宜詳述出產情形

實業 工商漁牧農家副業之製造經營各情形及出產量額資本工價等

項

行政

(1) 組織 現時行政機關之組織

(2) 財政 賦稅之徵收行政費之支配歷歲之盈絀地方款與省款之劃

分等項

(3) 治安 現時地方治安狀況團警成績等

(4) 自治 區鎮鄉公所之組織及辦理情形

教育 學校種類數目名稱地點就學人數社會教育狀況及歷代文化之

盛衰

金融 通用錢幣鈔券之種類平均每歲貨幣行情兌換數目詳查叙列



風土

(1) 宗教 凡釋道回耶天主各教信奉之人數及近年來比較日趨盛衰之情形均應詳叙

(2) 民生 詳叙普通民衆衣食住行之概況其所需要之來源并應述及

(3) 禮俗 述禮儀風俗習慣等項應極詳明惟以現在通行者爲限已往者不錄

(4) 歌謠 山夫村子之歌婦女小兒之唱宣中情之感發天籟之音凡有文學價值者均應採錄

(5) 方言 各地方言最不一致惟習之既久多成固定且有與古暗合成爲典要者應廣爲采入以資參證

人物 凡前賢往哲高士名人孝子義僕列女方外以及一行可錄片善足稱或事著簡編或名重鄉黨皆應叙列生平以闡幽揚美（均以已

故者爲限）惟必事屬確實人非假借慎重審覈以免濫燕凡已見史志者祇須提要述之（註明原傳見某書）未見著錄者則宜稍詳至如名宦及流寓名人亦可附錄

藝術 凡擅文藝技術專長者撮記事略

著述 有名著作錄其篇目名稱及著者姓名出版時代并略述內容

金石 碑碣鼎彝古物遺器無論已否見於著錄凡有史文藝術之價值者均應詳叙所在地點製作發現年代何人收藏鑄文澁妙者可附錄其文製作精奇者並可附述其尺度形狀

故事

(1) 史事 撮錄正史所載之故事并註明見於何史

(2) 軼聞 裨官野史所載故老所傳或有裨見聞或足充史料采擇錄入  
外 僑 僑民之國別人數職業及居留狀況

附註

- (1) 所定門類儻爲該縣所無者可略而不載惟須聲明
- (2) 各縣或有特別事項足充志料雖爲規定門類所不及亦應特立一欄附帶編纂以期完備
- (3) 此次徵集不厭求詳各門說明祇略舉其概并非完全以此爲限編時勿爲所拘

致劉琢之函

琢之仁兄閣下此次修志因病遷延時經半載慚悚曷極今爲便於閱覽起見分條叙列如下一叙印刷宜注意之處二叙校勘不可草率三叙紅點有無皆從略(四)省府所頒門類疆域地理分門氣候剔出於疆域之外擅長藝術者不在人物之中人口別行政而立實業物產金融不相統攝賢吏治完與鄉紳混爲一談皆不可因襲茲特更定南皮新志列官師一目湘綺撰志竊意教官既經裁撤可依通考名職官也

改區域爲建置以免與疆域之域字犯複改位置爲方位恐與建置之置犯複至面積具於縣圖故疆域門內不列此目 (五)各門類事蹟如有年月可考

者應卽加入如實在無法查考則亦聽之 (六)原稿以唐堯爲聖陽城以下

爲哲忠孝則前半爲忠後半爲孝 湘綺志孝友前半爲孝後爲友取其均在家庭也方技前爲方外後爲巧技取其器與道

合也若忠孝一盡力於國一善事父母自不得混爲一目義行雜糅特甚高逸收廉吏陳平田一井入流寓

名宦列完縣人物 此援省府所頒者 藝術分而爲二以工翰墨醫學者隸術字以詩文

兩巨册隸藝字 沿舊志藝文而誤 皆有可議甚至有一篇之中文氣不貫虛字欠適弟

對此思索數四終不敢不改竊附朋友切磋之義人物門全體更張餘亦刪改

然人物新目皆上宗正史旁採名人志例而參以己意詩文依章實齋別爲完

縣文徵未知諸公以爲何如至弟所刪改雖不敢云點石成金惟自問似可免

點金成鐵之誚云爾 人物名績忠良廉潔篤行任節孝友義僕殉義 一外

藝術 文學書畫武 原函列有姓名次序茲略 列女 七八 從略 (九)各門及子目小序

不必全作名人所修縣志皆然本編從之(十)鹽山新志筆有古致號爲特出惟於新學說似有所未窺須知吾國目前混亂爲歷朝改革後必經之階級固不可純持譏諷態度也本編一祛此弊且鹽山志以四略包括各門雖見匠心究不如湘綺各志隨事立名較爲大雅

### 完縣新志人物小序

章實齋最惡縣志人物列傳多標名目而鄉賢名宦流寓三項尤爲其所痛駁王湘綺衡陽湘潭桂陽三志宗之蓋正史首有列傳不另立名目附以儒林文苑孝友隱逸列女等目足爲方志之模範若多標名目反嫌包括不盡本編一洗舊志陋習特立名績篤行藝術列女四項名績卽正史之列傳也篤行卽正史之孝友隱逸諸目也藝術卽正史之文苑方技也湘綺志方技合方外及巧技而言茲提出方外入篤行列女仿正史而作更不待言篤行類分別諸名取便省覽並非瑣碎鹽山新志曰獨行湘綺則曰篤行篤較獨字爲賅備故採用之唐堯生於完之伊祁山若依

穆天子傳漢武內傳之例本可列爲傳首惟武功縣志列帝王於人物中爲章實齋所譏已成定論且堯之事蹟見於尙書史鑑學子皆知之無須贅述在完有政績者另入職官人物內不列陳平封曲逆侯依方志通例亦可於職官內略爲叙錄不得以其未到曲逆而棄之若稱流寓則慎矣田一井雖係安州板橋人然後寓於完越數年而卒舊志認爲完人甚當且依現在法例亦不得不以完人視之也故始入流寓而終改隸名績章實齋於虛列考語者特立闕訪列傳賈佩卿則彙刊傳末本編以其甚少不復有此分別閱者自可比較而得之

### 開縣處士先考墓表

君姓彭氏諱國清字泉源先世自洪武時入蜀明末有曰宗奇者任把總曾與張獻忠交戰祖曰玉奇父曰定芳世居四川開縣江里中和場街後陳家大灣君二歲父卒母改適潘爲祖父母所鞠育警悟天成讀書一遍能誦塾師異之以貧故不克久讀改業商往來綏定渝萬間其賬目注明天時晴雨及甲乙丙

丁交接故事隔數年而債務昭晰人不敢欺尤精珠算兩手持籌期于合符擊交某賬目紛雜無法澄澈客狡辯不認欸鉅事繁倩君往算幽微軒露客遂折服性樂箴規有儒雅風輒與友約互揭其失以資改正幼有同院者曰何興茂及其婦君敬老事之如父母終身饋遺不絕鄉人稱焉十七歲娶於陳生女而殤廿九歲陳孺人卒娶於譚無所出旋卒後娶黃孺人懋遷暢適朋儔鱗萃乃未幾而同人乾沒遂致弗振以迄於卒時光緒十七年辛卯歲也君用心細於毫髮親友預叩事之吉劣每就來時所覩物類推測將來奇驗異恒同里閨某開業儕輩往賀君亦與焉歸謂某今年得子必無穀道人以爲誕後竟如所言性愷悌端謹喜放生清宵嘗舍魚於潭恐有人知平居閒話人亦稱其語有勛兩有勛兩爲時諺卽魯論言必有中季布一諾千金之意動止有度坐時兩足平置於地畢世未見其交疊也整理群碎暫雖無用而後則資之迎母於潘敬養不衰及卒其前子亡去君營葬盡禮妹嫁潘生二子而卒亦爲君葬年進三

十五始得作楨視如拱壁四歲置膝上教以識字四千餘并用細竹籤令作楨排字遇橫豎相交則以二短籤左右合筭故妥貼可辨認六歲就外傳四書連讀朱註殷因於夏禮一節注最長夜間父子共枕令背誦作楨朗朗一字不漏君則大喜後每遇長章輒如此課之九歲學作制藝第一日題爲學而時習之君見而諭之曰爾祇作得一學字幸語有理致後須顧及全題始爲佳耳期望甚摯孰意作楨僅滿十齡而君卽長訣耶歿後尙搜得預購之詩文擬賜作楨誦讀者偶一尋覽恒不欲生且作楨半生以來出語凌沓起居弛怠若使君多在世十年或二十年作楨受其薰浸斷不致無檢制至此今胡不幸而長爲失教之人哉君生於道光二十七年丁未卒年四十有五葬中和場下河壩譚某屋側子三作楨譜名祚棟拔貢學部七品小京官民國歷任山西五台萬泉稷山及山東陵縣知事河北完縣縣長次殤三祚樑孫女秋霞冬雪孫顯錫長媳出孫女曉雯三媳出後四十有二年作楨追憶君之遺事哭而系以辭曰



良士真宅與譚妣鄰百世不朽保我後人

昔撰此表及後表胸中所欲言者卽痛快言之祇求其活畫出先考先母之眞像而已毫無一字粉飾其合於金石三例與否則非所計也 作楨忝仕

清例有贈銜然實際未贈且係前清之制故不用 把總見明史職官志舊日彭氏家譜稱千總蓋俗名也

### 先母黃孺人墓表

孺人姓黃氏諱桃四川開縣馬家溝人年二十歸於彭甸泉源君性方嚴孺人事之以禮懋遷之物被黃炳亭侵蝕家漸落光緒七年辛巳生作楨十三年丁亥生祚樑越四載泉源君卒室無斗儲孺人工繡山水人物以女紅供饗殮日暮挑燈門庭寂寂孺人纂組作楨旁讀音節淵然孺人顧而樂之毗鄰韓母一夕詢今何以不誦詩作楨卽抗聲吟春風疑不到天涯一律孺人亦莞爾乙未作楨滿十四應縣試頗爲知縣倪公所賞孺人遂促令赴府父執韋君言及同

考者譏作槓志大言大爲不當囑後無復然作槓意不自禁投孺人懷淚濕襟袖孺人慰解曰人謂爾志大言大雖譏之而適以譽之何悲爲特恐爾將來不能實踐耳迄今追思語猶彷彿在耳也孺人之弟年穉性慵母張孺人不忍責以事孺人則督令就吳妹倩習業不稍寬弛時作槓在校聆先生講愛之能勿勞乎朱註釋爲教子歸而述之孺人曰古人深惡荒悞垂爲鑒戒余何不可以教子者移之教弟又泉源君謂處世須敦厚無涼德孺人常舉以詔作槓令終身誌之其生平言行與古合轍類如此神勞形悴遂染沈疴作槓割臂上肉孺人食之仍無效臨歿之前一日猶催作槓整裝從王先生學次日自知不起始告以身後事作槓依戀涕泣母輒止之深宵彌留恐作槓過悲乃僞語頃夢觀世音來救兒可勿啼其聲微細附耳始辨之語甫畢而卒嗚呼傷哉展觀遺篋猶有刺繡時依據之畫冊親舊皆爲隕涕作槓何心能不哀哀孺人夙昔恒語作槓曰爾等他日婚娶余必教之成賢婦孰料兩媳不得親譽歎竟成爲無教

之人哉作楨半生庸凡甘背夙願尤不足以對孺人然後知幼時高談之難副而作楨在世一日義不容自懈也孺人生於咸豐八年戊午十二月十二日戌時卒於光緒二十三年丁酉正月初十日年三十有九葬中和塲後之燕窩巖越三十有六年哀子作楨始爲之表曰

幽域允臧在媳宅後佑我孫子彭祖比壽

爲舍姪仙錫不滿六歲悲悼其妹而殤徵求詩文啓

謹啟者余於民國十四年秋署山東陵縣舍弟云凡同往十五年國歷八月五日未時即夏歷六月廿七日弟婦生子於縣署余因疇昔長息未滿七日次息離胎卽殤舍弟亦卅六歲矣忽得此兒全家皆歡忭異常因名曰仙錫此兒容色端好人皆愛之是冬余卸篆赴平心中稍有不適見此兒卽欣然以解內子亦以無子之故鍾愛無異己出時撫之同睡十七年仙錫大病幾殆舉室惶然終以服同鄉龍芷瀆藥而愈十八年夏余署河北完縣臨行時弟婦將產余遂携仙錫赴

任留弟及弟婦住平國歷六月十九日戌時即夏歷五月十三日生一女名曰夏霖滿月後赴完余治事稍暇卽以抱持兩姪爲樂十九年八月土匪圍城羣情驚駭有訛言余潛出城者余爲安定人心計日令女僕携仙錫夏霖於大堂外遊戲已則步行街衢或到公安局小憩俾縣人知其與縣城同存亡未幾匪被縣警及官兵攻散而余亦解職回平矣廿年春余得子名昊錫仙錫雖幼竟視如胞弟是夏仙錫正滿五歲入市立十五小學讀書頗不鈍而夏霖亦離母懷體較仙錫爲壯性質聰穎余與弟方以爲得子雖晚轉瞬已赴學校頗有家庭之樂孰料禍自天降爲生平所未覩今春北平猩紅熱蔓延甚烈二月廿一夕昊錫大發熱內子於廿二廿三兩日抱往中醫韓一齋處診視適有一病婦同診內子不知其爲猩紅熱也憐而致詢及歸已帶病菌在身矣廿五日內子喉痛廿六日余覺口苦喉乾均延韓一齋到家診視廿八夕余不能平臥起坐則氣喘甚劇次晨始悉全身已發紅點自認爲猩紅熱恐傳染親屬遷移客廳臥室並命

霞雪到醫院注射血清然不能無侍病之人三女冬雪住客廳正室是夕卽病  
三月一日延德國名醫來診及四日余病已輕而冬雪病危冬雪昔在校染羊  
毛疔爲韓一齋醫愈遂改延韓來診五日早十一時云凡往酬完紳劉琢之余  
聞其出門時謂夏霖驟病囑霍僕請韓至時並診視夏霖醫尙未到忽胡厨傳  
言夏霖病無救細詢云夏霖昨夕嘔吐身熱今並手足痠癱此女素日聽順尊  
長之言及病毫未哭泣亦未服藥迨云凡回寓夏霖已氣絕矣當其垂危仙錫  
見而痛哭弟婦恐被傳染三次遣出惟死時弟婦正哀悼無已仙錫在旁悲啼  
遂亦聽之而豈知其病已傳染及身耶午後弟及弟婦攜仙錫同到醫院注射  
血清是晚長女秋霞因伏侍余及冬雪數夕未寢咽痛身熱稍發紅點惟仙錫  
已由吳媪遷至大盆胡同六日仙錫回寓在門房小食見夏霖棺材出門擲箸  
而悲身幾倒地經戴媪扶持而起未幾卽覺喉痛由韓來診是夕仙錫在大盆  
胡同新居猶與其女舅移運小磚石安置洋燭臺未之異也八九兩日仙錫出

疹氣促聲微十日余知其病篤堅囑云凡改延德醫克禮注射並開劑而去云  
凡頗不信西醫是晚仍請韓診余扶病往視仙錫猶呼伯伯不絕慘怛曷極回  
寓未天曉仙錫已枕云凡手而死矣未死時頻呼內子堅欲回寓後內子聞之  
因病未往視大哭失聲蓋仙錫孝友出自天性未滿六歲已如此今何棄我而長逝  
耶嗚呼痛哉使余早返故鄉不留戀舊都則傳染無從夏霖仙錫可以不死居  
舊都矣余夫婦得病如中西醫謂幼孩宜卽刻遷移他處則夏霖仙錫亦可以  
不死卽不遷移他處而早知協和醫院能收送往協和則亦可僥倖不死先是  
時請入德國醫院醫院不許或仙錫天性涼薄經其母遣去而卽不來視夏霖  
仙錫死後始知協和收容則時疫無從傳染夏霖死而仙錫當不死余兄弟夫婦不明普通醫理不知遠  
爲隔離僅與余異院致優秀之兩姪一旦夭折余實爲之豈能怨及天道哉秋  
霞冬雪侍候湯藥甚勤以致傳染雖云未死亦危險萬狀早知其如此卽不當  
令二女在余側也弟及弟婦男僕女役余半生以來德失行乖不先填溝壑而

兩姪竟淹忽以去自今以始余其無生存之樂矣每一思及輒廢寢餐因哭夏霖以聯云復覩瓊月復披夏雲同若姊三齡而死夏霖貌如夏雲聰比瓊月雲與月余二女四女也皆三歲而未哭半聲未服片藥先乃兄六日以終哭仙錫云十五年誕於魯廿一年歿於燕六辰尙未完妹去兄隨齊撒手家叔祖見其生郭外祖覩其死千里恰相值兩公皆由開縣來視余而正值仙錫生死聲微氣促最傷心又云見妹屍而痛哭親妹柩而震驚災禍無端獠紅條忽傳兒輩經父吸兮出邪仙錫病急云凡對口相吸而痰出倚父身兮入夢叩求罔應狐白荒唐說大仙云凡循俗迷信祀大仙求兒因得仙錫及其病也仍禱大仙而竟無效○以上全錄夏霖仙錫併殤記詳載月年不嫌瑣碎以備他日之檢閱敬求海內名賢賜以詩文寄北平宣內油房胡同二十七號永遠徵求詩文他日彙訂成冊分送俾兩姪雖死猶生則余兄弟夫婦當感佩無暨矣民國二十一年雙十節開縣彭作楨謹啟兩姪像列後

彭仙錫遺像



彭夏霖遺像





## 割股割肝不得爲孝論

孔子作孝經曾子受之嘗曰身體髮膚受之父母不敢毀傷故其易簣之時必  
啟手足以示其全受全歸後世人子以曾子爲法可也乃鄉曲妄人偏有割股  
奉親割肝愈疾之說一時之愚夫愚婦羣焉效之或傳其事而流連不置或誌  
其人而慨慕有餘甚矣其惑也夫股閒之肉腹內之肝非必如薑桂之足以益  
人豈能治疾哉果能治疾割之可也割之可也所慮者親之疾未愈而已之身  
已虧甚而利刃剖腹不幸而至於傷生則爲天地閒之至不孝者矣且以曾子  
守身之道而論割股割肝卽能治疾亦不過與藥劑同功而應以藥劑代之况  
萬萬不能治乎昔王祥臥冰求魚亦謂父母病思魚耳若人子之身乃父母之  
所生父母其思乎其不思乎卽烹而進之父母知其故其忍食乎抑不忍食乎  
此其理不待煩言而自解矣且人子值親之疾正自有道學武王之不脫冠帶  
而養可也學黔婁之嘗糞驗疾求以身代亦可也又何必爲人所難爲致被虧

體辱親之誚乎披覽古籍有截腸決戰以盡忠者矣有破指流血以示信者矣且有執斧斷臂引刀割鼻以見節烈者矣然彼皆爲之於事有濟非若此之矯同立異於事無裨也剜肉醫瘡不過古人之寓言耳今竟剜肉以醫疾得非愚乎嘗讀看雲山房詩曰我聞姚孝子割肝世所難鄙哉斯言也以割肝爲孝則守身者不得謂之孝矣守身者不得謂之孝則忘生輕死徒逞血氣之勇者反得謂之孝矣然乎否乎明宣帝時總旗衛整女割肝愈母疾禮部常請旌表帝以其毀身療疾於孝有虧史冊具在取而觀之可也世之人不鑒於此而偏以妄人之言爲可行亦獨何哉

此係余十八歲所作

光緒戊戌

先是家母病篤

光緒丁酉

余循俗說割肱以進而仍無效

後知其非是始作此論 雷禹門先生評曰本至性至情發爲絕大議論作者殆別有孝思乎今錄此篇不加刪潤藉存少年文體

### 劉先生面諭研究四部方法記

民國元年冬余由京返川廁迹內務司適劉申叔先生任國學院院長余與同  
司友人數人執贄爲弟子每逢星期五到劉先生處聽講說文三年赴京應縣  
知事考試四年春分發山西而劉先生適由山西來京余往謁因詢讀書之法  
先生曰研究小學當求本字古人通用假借並非有確定之理不過一時偶寫  
相沿至今其訓詁遂互通耳如字之從水者必與水有關係其絕無關係者自  
有其本字一人心思有限常萃衆學者共求之說文匡名在皇清經解續編內小學彙函  
小學考仿朱竹垞經學考廣雅疏證等均宜閱經學以分別家數爲第一要義清初人  
多不知之故每牽強附會漢書最是分明言諸儒習經必標明家數如齊詩魯詩韓詩等  
至三國以後遂混淆矣易看王弼詩禮均看註疏二者爲用功之始惟書則不  
必看註疏以僞尙書似已成鐵案故也左傳杜注最誤不得已惟看賈逵賈亦  
誤公羊看何邵公其書甚完全皇清經解正續編及今古學考亦不能不看探  
討史學方法有數端一參合他書補訂正史二就全史互相考證如十七史商權之類是

三就一史專門詳考四研究其典章制度於典制內又可專任一門如地理職官之類其他準此研究子書最忌如近人之編講義謂某處合於新政或新學

擇取其一二不觀全體

故子書可不多看而每書必全體研究如能校訂訛謬詳稽訓詁

使後之閱者不感困苦其功亦大也研究文學當熟讀後漢書亦可從三國志入手即學齊梁猶勝囿於唐宋者全上古三代秦漢三國六朝文及富順刻之八代文粹

或是選字當時未聽明白

當購讀他省文之高者至初唐爲止四川經張湘帥設

尊經書院後人皆不觀唐宋以後文惟多屬齊梁文字詩亦不是唐宋派故文字以四川爲得真種廖季平先生學問能自成一統系與歐西最近爲中國數千年來所未有合古今諸說而匯歸之有愜意處亦有不適處此其失也特彼志在改造世界有宗旨亦有辦法卓然名世良不可及歸寓後恐日久遺忘即拈毫記之民國四年三月

余於光緒之季肄業四川法政學校廖季平先生講清會典故見劉先生時

並詢廖師造詣何如今劉師已卒數年矣廖師亦歸道山偶閱此記爲之泣然憶昔曾購置廖師重要著述多種劉師亦有左龠全集出版深愧未能詳究也廿一年十月一日附識

### 稷山兩大奇案記

余署山西稷山時民間傳有兩大奇案蓋不奇於爲人命而奇於爲相隔九年及十一年之人命且後者屍亦不存卒之案破冤雪兇犯獲罪誰謂年久迹湮即可圖倖免哉民國三年稷山東里村農人程文平與程峯彥之妻李氏姦通李氏因圖姦便利與文平密議擬用擦面之粉以毒峯彥文平允之李氏於是年十一月廿八日復商得文平同意用粉攪入飯內將文平毒死峯彥母邢氏查得其情文平甘願奉養終身邢氏遂不究未幾李氏亦死延至民國十一年文平翻悔前議且以相距數載事無佐證供給漸闕邢氏具狀呈控而余適承乏稷山傳案由承審堂訊文平狡辯不認其家屬並向高等廳呈訴承審用刑

余電請廳轉飭臨晉著名檢驗吏來稷開棺肉已腐僅存骨耳骨盡黑依法檢驗確爲受毒余因承審被控開庭自訊反覆研鞫毫未用刑文平知事已畢露俯首甘承當卽判處無期徒刑又縣民楊小瓜在前清游手無業霸姦其兄楊林永之妾林永蓄謀殺害小瓜又於宣統三年竊盜一騾林永無可忍密託李回義轉請黃得祿代雇莠民吉成盛子於是年<sub>三年</sub><sup>即宣統</sup>九月間林永盛子回義吉成四人偕往新絳縣將小瓜尋獲捆綁回家行至汾河小瓜卽躍入河內林永回義恐其洩水逃逸令吉成盛子亦下河刀棒雜下而小瓜死矣當卽棄屍河內以掩其迹民國十一年省委刑事協助委員分赴各縣而稷山則爲宇文翰將至縣楊根成分向縣署及宇文委員處具控楊林永等謀殺小瓜事宇文諳練與余談及死者固可悲而被控者恐有枉稍一不慎豈不冤上加冤臨汾有一舊案發覺而屍已杳然廳令須驗屍定案縣署無可爲計被控之人久押放之不可辦罪又不能是其前車余深以爲然惟甚恐此案如確而兇犯逍遙

法外亦失其平遂電呈上峯請示前清命案屍又不見應否免究奉指令祇問事實之確否不在死屍之有無余囑承審須鑒於文平之事被控刑訊本案不得再蹈此弊傳集兩造一鞠而服余又覆查情事全真未加捶楚未施語言威嚇而慘案豁露大非始願所及豈果有厲鬼憑之耶抑法庭莊嚴足以褫其魄耶宇文見之亦爲首肯

堂訊時宇文在屏風後竊聽

余分別依法判處縣民稱快

### 誅夏占風記

民國十四年余署山東陵縣未數月軍事起省調用警備隊縣境防務空虛而紅槍會遂起會旨在保家禦匪然莠民雜廁恒藉會以蹂躪鄉愚平原夏占風到縣之鳳凰店當會首俗稱大師兄行爲多不法民衆逐之出境余得報急派城內警備隊廿名往駐藉防占風再來並曉諭紅槍會改爲保衛團惟不得書符誦咒呈報省署奉令嘉許鄉間指控占風前日綁票勒贖事主被殺一件余據以報請通緝十五年八月省催解款甚急余飭征糧處在鳳凰店設分櫃以

免人民到城繳欸之勞月之廿二日分櫃書記及駐警均返縣報告夏占風改名占永已充副團長率馬隊八十餘名均携有盒子礮住鳳凰店令其副官到城投公函余拆視係占風之長官護路隊請縣代占風追償舊債數十圓鈐記宛然細審非僞蓋占風挾客冬被逐之憤改名從軍今僞言村民欠債而實以報仇余當卽招集科長承審新舊警備隊長開一秘密會議舊隊長已調德縣因公來陵隊長以爲占風既投軍籍又是團副例應請上峯指令辦理承審則謂占風到境志在擄掠若不設法勦除閭閻罹患必深語甫畢而占風搜索某家品物並分令鄰村限日交欸之消息至矣余謂現值上峯忙於軍事對各縣多無暇兼顧拍發萬急之電守候回電亦須一星期始到占風桀驁如再逾七日各村財產損失必鉅今午接到德臨道尹來函云明日劉團長到德平勦匪路經陵城飭代辦給養意不如乘此時機函呈道尹轉請劉團長明日先勦占風俟事定後再詳細分呈軍民兩署如兩署斥爲不當余雖捨此身命亦所弗辭祇求人



民安定免其擄掠於願足矣議畢派快馬夜赴德縣未得覆函而劉團長已於次午至縣卽二十三日余携通緝占風卷請劉團長速剿辦以縣城警備隊同往並謂如將來上峯斥爲不應勦有己負全責劉聞其有馬有礮意戰勝後可爲所得欣然允諾是夕余召分隊長李福田到籤押房賜以坐諭之曰官兵不過壯我聲威其實剿辦之責全在縣警爾須奮迅直前殄此巨惡萬勿諉之官兵致占風逃逸占風豺狼其性如下次重來縣民受害更大且其時亦未必有官兵相值之巧如今日也福田答以願遵縣命省章縣知事兼警備隊長省委副隊長縣擇委分隊長余自兼隊以來不用私人皆遴選兵士中之驍勇者分長各隊福田爲陵人余覩其饒有膽略故用之廿四早副隊長及各分隊長先行官兵相從縣隊進鳳凰店警所距占風營約里餘副隊長使人往請占風來商要事占風帶數人均佩盒子礮昂然而至副隊長僞語以四境不安縣長請其幫助一切旋招占風入深室密談福田卽暗飭各警分執從人而自向占風身後

堅握其腰占風擬取盒子礮福田已以礮猛擊矣占風死福田用鬼頭刀斫其首卽號令凡隨占風來者均無罪蓋恐其聚而相抗也馬隊數十人驚竄四散及劉團長進村事早竣余聞信愉悅而德臨道尹由濟南來電謂頃護路隊面請飭陵代其團副追欵令縣速辦結余覆電謂占風通緝有案卽現充團副亦有盜賊行爲縣祇認其是匪不認其是軍官業經格殺未幾護路隊聞占風被誅恐余通稟詞涉及渠來函請余關注余以事關重大自擬一呈具報軍民兩署詳述其不能請示之故以爲槍殺軍官必蒙重譴靜候處分旋奉兩署會令云辦事迅捷嘉慰良深而殺人劫財之巨惡遂於此終結矣民國十七年舍弟云凡由直隸斯時尚未  
改北平山海關回舊都火車中聞人縷縷談誅夏占風事誠不意山東數年前擊賊今猶有人在關內歡欣而道之也此豈揚余才能哉亦以見天道不虛惡人終難獲善果耳全卷在陵茲述其略如此

此與前篇文不工而事核匆匆付梓無暇修飾自記

哀逝賦 并序

余讀戴公君厚記吳孝女墨蹟及海珊先生跋不禁泣然曰嗚呼天下事之可憐惻孰有逾於骨肉凋殞乎吳孝女沒時僅存母及姊弟海翁又以其哲弟夙零披覽舊著而慘慄焉余庭闈落落自先妣諸姑舅始以迄姊弟內子兒女姪輩十餘人或數齡或廿餘或卅餘卽召天闕祇吾父年四十有五耳念昔父卒六載而母疾棘余抱沈憂因割肱以進稍愈仍不起欲從母於黃墟轉念弱弟癡癡輒復苟活以視孝女之甘死不回其能無慙惶耶孝女之父與蕭君卓荃以拔貢知縣需次山東余後十二春亦忝選拔旋由晉調魯與兩君同官同省而不同時至日蕭君雖亡尙有人述其平度魚台曹縣泗水仕蹟卒之日宦囊蕭然撰述無存妻守窮廬遺嗣畧能自給從無有談吳君者吳君學優志廣未展驥足而早冥致寓魯同鄉不克舉其姪字其可痛更甚於蕭君抑不知迂拙如余他日又將何如也嗟乎仕宦不如志或稍如志而歿後無以贍其家甚至

遺文亦莫由垂諸後世如兩君之所遭者古今來豈少其人哉余因是先爲兩君悲爲類於兩君者悲而不暇自悲也已戴公光緒辛丑縣試余曾於風簷下識其風采未數年而戴公歿其遺文已垂諸後矣歿可無恨矣然余自離家至今擊交苦友如潘立三杜紹甫雷紹周等廿餘輩均踵吳蕭及戴公之後塵而奄逝遺文或傳或不傳得毋姚惜抱所謂有命耶姚氏謂文之傳不傳及傳身之久遠與否皆有命存焉羈燕都清秋多暇忽聞市衢弦聲頓思親故情之所至不可蕩滌於時西風蕭瑟涼月冏冏再繹遺墨悼怵於懷因爲之賦曰

昔晉代有向秀兮聆鄰笛而悽愴感稽呂之溘死分歷空廬而徬徨今聞幼女之謳謠兮不覺馳懷於舊鄉始知調均之動人兮今與古其相方懿親多未滿五秩兮朋曹亦忽焉而失行彭殤其奚能一兮經半生而累結腸展戴公之宿藁兮惜弱顏之罹殃靈樁條爾促齡兮雖殉躬其何妨彼衆兆之戀生兮反讎此爲失常戴公亦不永命兮直欲上叩夫顛蒼緊陸機曾歎逝兮潘岳且懷舊

而悼亡余愧無其婉麗兮惟親故橫於心而不忘爰染翰以抒情素兮同感者當紆鬱而怛傷

五台山文殊髮塔銘 并序

清季余在京聽講大乘起信論而怡愉由是漸讀內典民國七年權篆山西五台縣縣有山爲文殊棲靈之所高僧說經著稱於世六月大會遠省及蒙藏人亦有至者民雜事蕃縣知事例往坐鎮此山盛時計五百餘寺今稍減矣章嘉圖活佛住洪慶寺最爲嶽岑次則定海風景彌幽而塔院寺亦嶢崢塔院寺者文殊當年化一老婦募齋施者慷慨文殊留髮爲證因建塔藏之而造寺於其側余滯迹半月日則儻個各台與諸僧劇談夕則理訟牒焉山距縣城有兩日程烝黎知每年縣知事陟山有定期故民事投狀者頗夥而塔院亦遂爲臨時法庭矣日曠禽鳴層峯高聳濡毫銘之以誌鴻踪至山有專志文殊有彙典靈蹟爛然則不贅列也其辭曰

昔獲佛齒浮圖是營別得口髭遂起水精真臘石塔躋中泉盈旃檀供養靈鬚  
是盛七寶解脫頂骨崢嶸凡茲異蹟均兆丹誠佛告文殊刀塔笑擎清涼山峻  
金剛窟成歲月緜歷精覺妙明化身持鉢昭示衆生爰建琉璃龍護不傾如來  
一螺同此光瑩我雖落髮俗務纏縈溽暑戾止金相細評字非模糊迦葉畢呈  
無量無縫白馬繞行寄語來者鄙吝休萌

八世祖贊 有序

披閱家譜明崇禎十九年吾八世祖諱宗奇字不詳任把總與張獻忠交戰未  
載戰事勝敗及戰後情形如何然卽此一語已足見吾先代之趨材鮮儔矣逐  
北可徵其孤績敗亦不失爲猛士讀蜀碧一書蜀人被獻忠慘斫者不可僕指  
則此戰之無結果人所共見也如預測戰無結果卽偃革罷刃而退國家何貴  
有此武吏斯戰也爲一己振英威卽爲吾族增榮寵屬在微裔敢不繫仰爰爲  
之贊以勵宗支其辭曰

鄱水汝勵廬陵思永顯宗迢迢曷敢希幸江代原叙云少年鼎甲鄱水鍾彭汝  
瑞余以爲旣無世系勵之奇壯志科名廬陵毓彭思永之祖溯八世末秩困滯羽檄紛來望飄彌厲獻忠不忠怒碧  
可指何得妄爲攀援

刀紅人多却馬祖獨貫虹冀獲一剋捍鄉衛國志雖未酬稔寇變色

宗奇公生天祿祿生純義義生思恭恭生朝華華生天玉玉生玉奇奇生定  
芳芳生泉源君君生作楨把總見明史職官志舊譜稱千總蓋沿俗名也

答鄉人

余距蕭君卓荃所居僅四里而祖塋則相鄰蕭君光緒丁酉拔貢知縣越己酉  
余步其後忝厠京曹鄉人遂以余比蕭君民國余考取縣知事由晉而魯蕭君  
早故得晤其嗣舊輩寂寥知者扼腕時正課吏余獲首選調魯半載捧檄來陵  
人又以爲余遭際在蕭君上嗟乎蕭君已矣論余身世豈能與之相衡且稱爲  
出乎其右哉爲祛鄉人之惑謹陳不如者五端蕭君誕自儒門家有沃壤藝圃  
書林雍容誦讀未入學宮先遊京華余微弱孤苦上無伯叔時艱遇蹇筆耕自  
力勞借還於一甌勉步趨於遙路其不如一也蕭君義篤怡怡皆以材稱仲雖  
蘭摧季則玉立余幼遭家艱同氣依倚鞠養鉅責肩之藐孤馳騫虛名連枝佻  
別廿年有失提挈壯強猶發舊痾上負萱慈一世怫鬱其不如二也蕭君蚤得  
三息庭闈雍雍荀氏高陽之異夏侯小大之稱雖比烈未遑而清白可紹余二  
雛翳歿比兒物化莊子齊彭殤今乃變爲彭氏之子多殤矣昵友聞之易悲爲  
笑昨春五十竟獲賤息客爭慶夫熊羆身轉傷夫遲暮其不如三也蕭君清晚



民初四館銅墨文法疏闊張弛宜民良驥之足未絆魯士之肘得舒余仕遲十

禩章制纍纍防官甚於禦盜此某公之言親民儕於走卒俸薄填餉衙仄棲軍興左

則右懟益衆則上斥循劣憑諸簧口瓜代有如檻囚雖膺百里之任何有生人

之樂其不如四也蕭君琴堂清暇侍母板輿費重樂多極愜夙志余門緒零落

十歲喪父哲母勤劬孤燈熒熒左織右讀慨雞豚之未逮余十六而母卒徒作吏於廿年殘

臘早春母生於臘月初十尤增慳恆其不如五也餘事羣碎識之於心握管難下

不忍傾寫昔劉孝標比迹敬通蕭選載之汪中又上儕劉氏較其同異皆以古

例今藉抒麗藻余之所陳沿於鄉譽所譽有徵非同設問憶光緒乙未余應縣

試蕭君已補廩膳一面夙緣終身在念此不特以今例今直於所見之人恣其

參互耳下更塵俗項強體餓晉冀寅僚同此感喟未苦而呼庶幾免之

右文十五首(一)完縣新志序 (二)又序附凡例府所頒徵集門類省(三)致劉

琢之函 (四)完縣新志人物小序 (五)開縣處士先考墓表 (六)先

母黃孺人墓表 (七) 爲舍姪仙錫悲悼其妹而殤徵求詩文啟 (八) 割

股割肝不得爲孝論 (九) 劉先生面諭研究四部方法記 (十) 稷山兩

大奇案記 (十一) 誅夏占風記 (十二) 哀逝賦 (十三) 五台山文殊

髮塔銘 (十四) 八世祖贊 (十五) 答鄉人 後附詩一首

監隱先生以北游詩紀見示因題其後 民國十二年癸亥集漢魏六朝詩每句不同人

夫婦會有宜 傳毅 臨眺殊復奇 沈約 迢迢有餘閒 曹茂 相伴綠水湄 王粲 遠遊何所見

秦 苾 仰視浮雲馳 李陵 大道夷且長 鄺炎 季冬風且涼 劉楨 地主觀山水 孫統 兀若遊羲唐

謝 安 京華佳麗所 李德林 鳳凰鳴高岡 無名人擬李陵詩 高殿鬱崇崇 徐幹 萬事成疇昔 何遜 友

朋集光輝 阮瑀 聊齊朝彥跡 盧諶 遨遊快心意 曹丕 素襟不可易 陶潛 識曲聽其真 古詩 聊

可瑩心神 左思 行行遂成篇 陸機 上苑逐名辰 鮑泉 携手長相隨 嵇康 風土豈虛親 陸雲 今

我欣斯遊 桓偉 光風正悠悠 梁武帝 開春獻初歲 謝靈運 舞影入江流 徐君蒨 薄言答嘉

詩 母丘雍容慙昔劉孝

補完縣新志民間傳說小序

或問民間傳說與軼聞有何區別余曰軼聞與完縣地理有關係或他處之人到完留迹或完縣之人發生異事民間傳說則超乎完縣地理而野老村婦資爲口實者也例如四川

民衆多言劉秀十二走南陽之窮困趙匡胤與陳搏對奕失口賣華山漢光武宋太祖並未到川而下級人民恒道之又如孟姜女哭倒萬里長城梁山伯祝英台男女同學非四川事而四川婦孺稱頌弗衰其所談者亦與他省有差異

蜀中縣志如能對此等事擇尤登載閱者即可取以資比較論理民間傳說亦得附入軼聞惟各縣舊志皆有軼聞一項名或異而實則同其所載者以涉及本縣地

理爲限否則民衆雖纏纏傳述文人韻士均嫌其鄙俚不屑道豈肯加入縣志

哉例如孟姜女載入臨榆縣志以臨榆有長城且相傳有孟姜女之墳也四川傳說孟姜女之事與臨榆縣志又稍有不同特各方志未載耳本編

特提民間傳說以別於軼聞俾此種普遍之傳說可以選擇容納其不隸故實門而附於方言歌謠之後者蓋明其爲民衆劇談資料云餘義見劉君琢之總

序茲不贅

憶作楨於光緒乙未赴院試同寓雲陽程某蓋早入泮而特應歲考者也一日忽聞程某高唱曰盤古開天分地圖三皇五帝氣運爭鍊石補天女媧母伏羲畫卦馬負圖堯傳舜位號聖主禹平水土九河疏此為俗傳八仙圖之第一頁八仙圖敘述趙銀棠銀蓮姊妹事此非戲曲蓋用七言或三四之韻十字敘事者吾縣下級人民多知之不料程某身入學宮亦熟習焉又韓湘九度文公十度妻婦女尤為樂道多能述其始末齊東野語其勢力之普遍竟如此

哀逝賦補注

先妣諸姑至姪輩先妣陳孺人繼妣譚孺人均廿餘歲卒先

孺人女明林內子李氏均卅餘歲潘立三名大道志氣高邁日杜紹甫雷

紹周貧而苦學並以授徒為業無遺文

民國廿一年十月二十日出版

北平西河沿擴華印書局印

# 82  
42-1224  
(3)